

四庫全書

史部

欽定四庫全書

史部

宋宰輔編年錄

目錄

卷一
序

詳校官太常寺少卿_臣陳桂森

編修_臣程嘉謨覆勘

總校官庶吉士_臣張能照

校對官編修_臣許兆椿

謄錄監生_臣夏大鼎

欽定四庫全書

史部十二

宋宰輔編年錄目錄

職官類一官制之屬

第一卷

太祖皇帝

第二卷

太宗皇帝

第三卷

真宗皇帝

第四卷

仁宗皇帝上

第五卷

仁宗皇帝下

第六卷

英宗皇帝

第七卷

神宗皇帝上

第八卷

神宗皇帝下

第九卷

哲宗皇帝上

第十卷

哲宗皇帝下

第十一卷

徽宗皇帝上

欽定四庫全書

編年
目錄

第十二卷

徽宗皇帝下

第十三卷

欽宗皇帝

第十四卷

高宗皇帝上

第十五卷

高宗皇帝中

第十六卷

高宗皇帝下

第十七卷

孝宗皇帝上

第十八卷

孝宗皇帝下

第十九卷

光宗皇帝

第二十卷

寧宗皇帝

臣等謹案宋宰輔編年錄二十卷宋徐自明撰自明字誠甫號愷堂永嘉人嘗官太常博士終零陵郡守始神宗命陳繹為拜罷錄元豐間司馬光復作百官公卿拜罷年表上之其後曾鞏譚世勳蔡幼學李燾各有撰述而缺畧未備自明因作此書以宋世官制中書

樞密為二府俱宰輔之職故自平章事參知政事樞密使知樞密院事及同知簽書樞密院事皆著其名位而詳其除罷黜陟之由編年系日起建隆戊午迄嘉定乙亥大都本之通鑑長編繫年要錄乙未錄東都事畧而又旁採他書以附益之本末賅具最為簡晰又據宋朝大詔令玉堂制草備錄其鎖院制詞更有裨於文獻宋史宰輔年表其紀述皆以

此書為準而亦頗有錯互如建隆元年趙普
拜樞副此錄在八月甲申而年表在戊子太
平興國四年石熙載拜簽樞此錄在正月庚
寅而年表在癸巳太平興國八年宋琪拜參
政此錄在三月庚申而年表在癸亥雍熙三
年辛仲甫拜參政此錄在六月戊戌而年表
在甲辰此類極多足為讀史者考異之助至
宋世所降麻制例載某人所行之詞此錄間

存姓名亦可備掌故特其中如端拱元年呂
蒙正拜相制為李沆詞治平二年文彥博除
樞密使制熙寧二年陳升之拜相制為王珪
詞元符三年曾布拜相制為曾肇詞並見於
宋文鑑而此反闕註撰人其他似此者甚多
又熙寧四年陳升之起復入相以力辭不拜
而制命已行其詞出元絳手亦見宋文鑑中
乃并其文佚而不載俱不免有所挂漏然二

百五十年間宰執之賢否進退畢具是編於
以考國是而備官箴洵無愧淹通之目矣其
書在寶祐間自明子居誼宰永福嘗刻之縣
學後漸亡佚明嘉靖間大興呂邦耀始得抄
本於焦竑家而缺其兩卷後周藩宗室勤美
以所藏殘本補足因復梓而傳之焉乾隆四
十一年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

宋宰輔編年錄序

本朝大詔令登載相麻不及執政之制宰輔拜罷錄僅紀歲月名氏而揚廷之命無述焉覽者病之故太常博士徐君自明纂成宋朝宰輔編年錄二十卷首起建隆庚申至于嘉定乙亥凡二百五十餘年本之以長編繫年錄緯之以大詔令拜罷錄興夫玉堂制草諸書而一時黜陟之由羣公評品之論奉常行實之攷旁引曲彙

金史卷八十八
廉有漏略其用心亦勤矣夫一代之盛則有一代之元
勲碩輔鉅德豐功銘于闕彝鼎書于旂常竹帛固不
待贊述其間賢佞進退正邪消長關於世道泰否者瞭
然一覽之頃辭令云乎哉彼齊魯大臣史失其名漢相
列傳獨書免冊是編也其亦足為信史羽翼歟君之子
居誼宰永陽有廉稱輟奉鋟梓于學可謂能成先志者
我宋億萬年無疆惟休臣亦有無窮之閏續而書之未
有艾云寶祐丁巳清明寶章閣學士通議大夫提舉

隆興府玉隆萬壽宮嘉興縣開國子食邑六百戶陸德
輿序

永嘉徐常博自明作宋朝宰輔編年錄其子永陽邑大
夫居諠刊之于梓謁序于予予曰宰輔者安危治亂之
所寄也漢四百年稱蕭曹丙魏唐三百年稱房杜姚宋
豈不憂憂乎其難矣哉國朝自建隆以至嘉祐趙韓王
普李公昉宋公琪張公齊賢呂公蒙正呂公端李公沆
向公敏中畢公士安寇公準李公迪王公旦王公曾晏

公殊杜公衍富公弼文潞公彥博韓忠獻王琦又何其
彬彬然盛也中間不幸而王安石相姦庸相繼庸則陳
升之吳充韓絳姦則王珪蔡確韓頴元祐更化幸而有
司馬文正公光呂正獻公公著范忠宣公純仁數人又
不幸而章子厚相姦兇復相繼蔡京過于章子厚王黼
過于蔡京若曾布趙挺之何執中劉正夫余深鄭居中
微不及于厚京黼造禍者姦成禍者庸禍極于吳敏何
梟輦而不可制矣若二人者又姦庸相半者也嗟夫人

耶天耶天將開建隆以來之治故名臣相項背天將兆
靖康之禍故姦兇接武李公忠定綱言驗于䟽水功驗
于圍城高皇帝以其為命世之英而相之不越七十有
五日間之者黃潛善也忠定昭武人潛善亦昭武人並
生而並相豈非天乎潛善罷忠定亦竟不得志趙公鼎
張公浚忠定之亞也相皆不得久而久于其位者秦檜
也忠定張趙金所惡也檜金所喜也其久其近天意可
知矣自後相有可稱者陳公康伯陳公俊卿趙公汝愚

而已中興而後又何其太寥落耶侂冑之徒則世目以
為京檜者也賢者則不得久而侂冑之徒皆得久于其
位此豈人耶予嘗論三代而上伊傅周召皆以儒者相
大儒如孔子不過攝相而已孔子而後以儒得相者惟
司馬文正公豈非盛哉然亦不得久何若神宗以所以
待安石者早相司馬公及程公顥天下豈不被儒相之
福耶論皇宋宰輔者每為之三太息常博之為是錄也
于美惡皆不沒其實賢于世之類書多矣寶祐五年五

月

闕

日龍圖閣學士朝奉大夫新知西外宗正事趙

闕

故太常博士徐公永嘉之經師宿儒容止靖嚴言悉中
節行不越矩論著滿室蠅頭手筆無一字不端楷皆有
益于世教其錄宰輔也昉時年十八九執冊應對其間
粗審顛末後三十餘載欲板于三山郡齋而未果會公
之子居誼來宰永福政成能以俸金刻之縣學為一代
之盛典可敬也公字誠甫號愷堂終零陵郡守云寶祐
五年五月五日朝散郎集英殿脩撰提舉建寧府武夷

金史紀事本末 序
山冲佑觀永嘉縣開國男食邑三百戶賜紫金魚袋陳
昉謹書

司馬溫公既體春秋左氏傳為編年一書又欲倣班史
叙宋興以來百官沿革公卿除拜作百官公卿表以便
省覽今觀徐公編年惟及宰輔而百官不及則于省覽
為尤便宋朝歷代名德布滿百職輝映史冊先後相望
溫公猶思表而出之夫豈不足于夷攷而公之編年曰
姑舍是非略也媿諸作室之工書于棟者惟都料匠與

副之而梓人不與焉公之編年意或以是夫大臣之進退臧否國之否泰繫焉關涉至大故公之為此書也自建隆庚申訖嘉定乙亥其間元臣碩輔誥命所褒建議所否出處之顛末德業之污隆長編繫年所不載拜罷錄年表所不具而雜出于他書旁搜遠括靡有遺棄矚為卷帙用工雖勤然操其樞要舉其宏綱賢于勞而寡要者遠矣談者咸謂是書之成可觀世道吁豈惟是哉觀慶厯之盛則杜富韓范之事業在所勉觀熙豐之事

則荆舒之學在所懲下不負所學則景行先哲區別邪
正以丕寅亮之規上不負吾君則追法前猷吹蕪往轍
益謹乎若時登庸之道則是書有補于世所以續皇家
萬億年無疆之休自此編年始真作宋一經者也公諱
自明嘗為太常博士子居誼宰永陽以廉名鳴琴之暇
取家藏之祕鈔于邑序使岳世懿範不至無傳厥功不
在編年下寶祐丁巳八月朔中奉大夫福建路轉運判

官章鑄序

欽定四庫全書

宋宰輔編年錄卷一

宋 徐自明 著

太祖建隆元年

庚申

二月乙亥周宰相范質司徒加兼侍中

自守司徒兼門下侍郎同中書

門下平章事昭文館大學士叅知樞密院事依前守司徒加兼侍中

王溥加司空

自尚書右僕射兼門下侍郎同中書門下平章事監脩國史叅知樞密院事加守司

空兼門下侍

郎同平章事

魏仁浦加尚書右僕射

自樞密使行中書侍郎同中書門下平章事集賢殿大學士依

前樞密使加尚書右僕射
兼中書侍郎同平章事

國朝沿唐故事以太尉司徒司空為三公以尚書
令侍中中書令為三省長官以同中書門下平章
事為宰相以左右僕射為宰相官○守司徒司空
唐故事雖三公亦必冠以文散階國初因之○宰
相所居省謂之中書門下國政所出也宰相初拜
無有不帶中書門下侍郎者舊制三師三公左右
僕射平章事並兼兩省侍郎首相兼門下侍郎次
相兼中書侍郎○宰相分領三館亦因唐及五代
之故首相為昭文館大學士其次為監脩國史又
其次為集賢殿大學士○樞密院起于後唐莊宗
以郭崇韜為使始分掌朝政與中書抗衡晉廢復
置自是相承不改周宰相范質王溥兼叅知樞密
院事魏仁浦兼樞密使至是質溥皆罷叅知樞密
院事魏仁浦獨仍舊兼樞密使○官制沿革

制曰虞舜有納麓之功弗迷風雨夏后享錫圭之瑞乃

奠山川然後大洽謳謠光符揖遜顧惟涼德驟集鴻名

既用心以存公思與物而更始式宣景化屬在冢司乃

眷弼臣宜疇異數

具官范質

鎮時雅量綿俗宏材明去就于

幾先識變通之可久岩廊益峻衡石無欺十載于茲萬

邦咸乂

具官王溥

策名藩府佐命前朝冠顏子之四科陳臯

陶之九德秉彝不柰惠迪有光寅亮之功措紳允矚

具官

魏仁浦

謙和有立謹重自持周旋三事之司練達萬幾之

務言無洩露望洽彌綸康濟之才邦家所注咨爾三后
弼予一人而皆稽玄象以酌羣情率具僚而遵外禪是
用進為常伯命作司徒叙百揆以奮庸張四維而是賴
於戲託王公之上既開國以承家倚輔相之臣期代天
而理物各踐厥位時維欽哉

本朝大詔令

國初命周朝三相同為一制至罷相亦然後太宗
命宋琪李昉並相及李昉張齊賢並相其制亦同
自後二相並命皆各自為制云。國朝范魯公質
王文獻溥魏宣懿仁浦秉鈞史館昭文集賢三相
俱全自後太宗初即位薛文惠居正沈恭惠倫盧
大戎多遜真宗咸平二年李文靖沆向文簡敏中

呂文穆蒙正仁宗至和二年劉文忠沆文潞公彥博富韓公弼元祐初司馬溫公為左僕射文潞公卒章軍國重事呂正獻平章軍國事皆三相也至三年溫公薨文呂二公在位而呂汲公大防范忠宣純仁為左右僕射始四相然不久也五朝俱立三相○本朝宰相兼公師者范魯公王文獻趙韓王薛文惠自後王文正丁晉公馮文懿王文公呂文靖韓忠獻曾宣靖富韓公文潞公呂正獻蔡師垣秦師垣陳魯公而已餘皆罷政後方拜○掉麈錄○宰相兼公師

質字文素魏州宋城人溥字齊物太原榆次人仁

浦字道濟衛郡汲縣人○初質溥皆舉進士仁浦

少為刀筆吏隸樞密院周世宗朝自樞密承旨拜

中書侍郎同中書門下平章事兼樞密使始議者以仁浦不由科第進世宗曰顧才如何耳遂用之

王稱東都事畧

○太祖以是年正月甲辰受禪于周二月

乙亥首用周朝三相范質嘗奏疏言宰相者以舉賢為本職以掩善為不忠所以上佐一人開物成務端明殿學士呂餘慶樞密副使趙普富有時才精通治道經事霸府歷歲滋深自陛下委以重難不孤倚仗每因款接備覩公忠伏乞授以台司俾

申才用今宰輔未備久難其人以二人器能攀附
幸會孰謂不然上嘉納之

李燾通鑑長編

先是宰相見天

子必命坐有大政事則面議之常從容賜茶而退
自餘號令除拜刑賞廢置但入熟狀畫可降出即
行之唐及五代皆不改其制猶有坐而論道之遺
意馬質等自以前朝舊臣稍存形迹且憚上英睿
每事輒具劄子進呈退批所得聖旨而同列署字
以志之嘗言于上曰如此則畫稟承之方免安庸

之失矣上從之由是奏御寢多或至盱眙賜茶之
禮尋廢固弗暇于坐論矣遂為定式蓋自質等始
也○慶厯二年二邊用兵富文忠公為制誥建言
邊事繫國安危不當專委樞密周宰相魏仁浦兼
樞密使國初范質王溥為宰相兼叅知樞密院事
今兵興宜使宰相以故事兼領仁宗然之遂降制
以宰相呂夷簡兼判樞密院事章得象兼樞密
使

南窓紀談

同日樞密使吳延祚同中書門下二品

延祚字慶之太原人太祖即位仍舊為樞密使除
同中書門下二品以父名璋故也是年五月詔親
征李筠以延祚為東京留守及征李重進又為東
京留守

八月甲申趙普樞密副使

自右諫議大夫樞密
直學士兵部侍郎除

唐制省部寺監之官備貲而已無所職掌別領內
外任使而省部寺監別設主判官貲額本朝尚循
唐制六部尚書侍郎與左右諫議
大夫等官皆空存其名而無其實

普字則平范陽人太祖領定國軍節度使移鎮滑
許普皆在幕府最後為歸德軍節度掌書記太祖
受禪普以佐命功授右諫議大夫樞密直學士既
誅李筠普以功遷兵部侍郎除樞密副使

事畧本傳

建隆三年

壬戌

六月癸巳吳延祚罷樞密使

為雄武軍節度使依前同中書門下二品

先是制下前一日太祖謂延祚曰卿久在樞要年
齒漸高今與卿秦州以均勞逸明日制當出恐卿

以離朕左右不能無憂故先告汝云

范冲宰輔
拜罷錄延

祚仍舊為樞密使凡二年五閱月延祚好儒學聚書數千卷卒贈侍中子元宸尚太宗女蔡國公主聚書至數萬卷積官至山南東道節度使國朝以

來尚主者獨稱其賢

畧事

十月辛丑趙普樞密使

自兵部侍郎樞密副使除
檢校太保兼御史大夫充

御史臺雖有大夫貲而不除四色憲衙自監察御史至御史大夫號為憲衙檢校則自國子祭酒至三公亦唐及五代舊制也而國朝遵之元豐新制官名削去憲衙檢校官○官制公革

制曰王者端居九重馭朽敢忘于大業躬決萬務坐籌
思得于良臣而况蕭曹故人燕趙奇士霸府早推于佐
命公朝允協於陟明具官趙普識洞化原才優王佐契風雲
之玄感稟象緯之純精首參開國之功實負致君之略
已升宥密方隆乃睠之恩未止樞機豈稱疇庸之典俾
膺重任用獎元勲爾其佐佑冲人緝熙庶績無忝股肱
之寄勉伸帷幄之謀徃其欽哉服我光寵

普在樞府四年而相

同日李處耘樞密副使

自宣徽北院使右羽林衛大將軍除宣徽南院使檢校少保兼

宣徽南北院使唐末舊官也置院在樞密之北總
四諸司及三班內侍等事國朝立南北宣徽院各
置使以待久次侍從或寵前執政作帥位亞僉樞
俸同執政武臣勲舊建節久次多以北院使處之
或同簽書帶此官事見筆談與官制舊典○國朝
小使臣供奉官而下皆隸宣徽院使恩禮遂同二
府而班樞密副使之上雍熙中置三班院事專領小
使臣授任而宣徽使如舊其後班級遂下樞密副
矣

處耘潞州上黨人初周世宗以處耘隸太祖帳下
為都押牙陳橋推戴處耘臨機決事謀無不中太

祖奇之累遷至宣徽北院使至是遂有此除

乾德元年

癸亥 建隆四年十一月改元

九月丁卯李處耘罷樞密副使

責授淄州刺史

制曰昨者南出師徒俾令監護所宜宣力以副朕心但聞動恣胸襟每多率易既乖倚注合正刑章尚念已著徽勞特從寬典俾提郡印用示優恩

處耘自建隆三年十月除樞密副使至是年九月罷在樞府僅一年○初朗州亂遣使求救于朝廷

太祖命襄州慕容延釗帥師赴之以處耘為湖南道行營都監處耘自以受非常之遇思有以報臨事專制不顧羣議由是與延釗不協更相論奏朝廷以延釗宿將止罪處耘處耘亦不敢自明云

拜罷

錄

○太宗明德皇后處耘女也處耘累贈韓王子繼隆積官至山南東道節度使開府儀同三司配享真宗廟庭

乾德二年

甲子

正月戊子宰相范質王溥魏仁浦並罷政事

質自司徒兼侍中除

太子太傅

溥自司空兼門下侍郎同平章事除

太子太保

仁浦自樞密使兼中書侍郎同平章

事依前守尚書右僕射

東宮師傅以下官屬舊制不常設乃以三太三少

師傅除前宰相執為致仕官若太子太師太傅太保

以待宰相官未至僕射者及樞密使致仕亦隨本

官高下除授太子太師太傅

太保皆位一品○官制舊典

制曰開物成務既伸佐國之功以逸代勞宜舉優賢之

典其有位叅四輔功著兩朝始終克茂於嘉猷進退敢

忘于異禮

具官范質

貞規鎮俗清德服人

具官王溥

經緯全才措

紳雅望

具官魏
仁浦

素通儒術兼練武經而皆挺金石之淳

誠廓江湖之偉量夙夜匪懈知無不為佐予開勦之基
賴爾緝熙之績雖位隆三事所宜勉輔於冲人而日有
萬幾安可久煩於舊德俾令就第用解持衡升一品於
春官總六卿於會府永保崇高之秩用光翊戴之勲

三相自建隆元年二月拜相至是年正月罷並相
太祖四年南郊畢並再表求退仁浦以疾請告太
祖幸其第賜黃金器二百兩錢二百萬表乞骸骨

至是同制罷相或告病未寧或勤勞可憫並從優

禮云 李攸通今集編

李淑奏議曰太祖用周朝三相五年而後以趙普代之凡十年始以薛居正沈倫代之

質乾德初封魯國公質在相位所下制勅未嘗破律命刺史縣令必以版籍為急使者按民田及獄訟皆召見為述天子憂勤之意乃遣之時號賢相畧以乾德二年卒質寢疾上數幸其第臨觀質以廉介自將五代以來宰相多取給於方鎮質始絕

之及卒上甚悼惜之贈中書令其後太祖因講求
輔弼謂左右曰朕聞范質居第之外不殖資產真
賢相也太宗亦素重質嘗對近臣稱累朝宰相以
為循規矩重名器持廉節無出質之右者其所不
足但欠世宗一死耳長編○溥自乾德元年十二月
加特進二年正月除太子太保開寶二年除太子
太師入謝上顧曰溥十年作相三遷一品福履之
盛近世所未有也長編故事一品班於臺省之後太

祖因見溥謂左右曰溥舊相當寵異之即令分臺

省班於東西遂為定制

拜罷錄

太平興國初封祁國

公卒贈侍中謚文康孫貽永尚太宗女鄭國長公

主仁宗朝拜樞密使○仁浦開寶二年從征太原

遇疾而卒謚宣懿以子咸信尚太宗女永慶公主

追封齊王咸信積官至保平軍節度使平章事

庚寅趙普拜相

自樞密使檢校太保授門下侍郎同平章事集賢殿大學士

制曰闕散同功歸馬遂隆於周道蕭張叶力斷蛇因聲

於漢基必資佐命之臣以輔興王之業

具官趙普

功參締造

業茂經綸稟象緯之純精契風雲之良會洎贊樞機之務屢陳帷幄之謀沃心方佇於嘉猷調鼎宜膺於大用俾踐台衡之任仍兼書殿之榮爾其罄乃一心熙予廢績君臣相正勿忘獻納之規夙夜在公勉致隆平之化往服休命無愧前脩

范質等三相罷遂相趙普上既除普及樞密使李
宗矩乃無宰相署勅普因入奏其事上曰卿但進

勅朕為卿署字可乎普曰此有司所行非帝王事也乃使問翰林學士講求故實竇儀曰今皇弟開封尹平章事即宰相之任也上從儀言乃命皇弟署勅長編普既拜相事無大小皆決於普太祖待普如左右手是日監脩國史故事宰相兼勅皆用內制處分今止用勅趙普監脩國史非舊典也蓋失之事畧五年三月除尚書右僕射兼門下侍郎充昭文館大學士○自唐以來方鎮多以賦入自擅而

上供殆鮮場院率令部曲主之厚歛以自利其屬
三司者輸額之外輒歸已或私納貨賂以事貢奉
用冀恩獎普勸太祖革其弊方鎮闕帥命文臣權
知所在場院間遣京朝官廷臣監臨諸道置轉運
使諸州置通判使主錢穀自是利歸公上矣又數
遣使者分詣諸道選本道兵驍勇者籍其名送京
師以備宿衛教習精練太祖每御便殿親臨試之
不數年兵甲精銳府庫充實皆普之謀也

事普薦

曹彬潘美可用其後太祖征嶺南用潘美伐江南
任曹彬而二國卒平同普佐太祖太宗定天下平
僭偽大一統當其為相每纔歸第則亟闔戶自啟
一篋取一書而讀之有終日者雖家人不測也及
翼旦出則是事決矣用是為常後普薨家人始得
開其篋而見之則論語二十篇普獨相凡十年沉
毅果斷以天下事為已任上倚信之故普得成其
功嘗欲除某人為官不合上意不用明日普復奏

之又不用明日又奏之上怒裂其奏投諸地普顏色自若徐拾奏歸補綴明日復奏之上悟乃可其奏後果以稱職聞

長編

○世多言本朝任相不專自

罷坐論之禮始嘗觀趙普相太祖十年雖置叅知政事而不押班不知印普亦自信不撓訖用成功上嘗欲使天雄節度符彥卿典兵普屢諫不聽宣已出復懷之請見事遂中止又嘗怒殿前都指揮使韓重寶欲誅之普以為不可上怒猶未解普開

陳愈切竟納其言兵權所在人臣最難言而趙普
罷符彥卿成命於已行之後貸重貲之死於將戮
之時任相猶謂之不專乎

陳傳良建隆編乞罷符
彥卿事乃普為樞密使

時事
耳

同日李崇矩樞密使

自宣徽北院使右監門衛大
將軍判三司遷檢校太保除

制曰出司財賦既彰幹蠱之功入掌樞機宜舉疇庸之

典

具官李
崇矩

夙懷器業久著勞能守素履以不渝秉純誠

而益固洎居近列兼筭利權均用愛人不加於常賦濟

時成務但見於豐財考績斯多陟明惟允是用擢升宥
密持示倚毗叅予帷幄之謀罄爾彌綸之效沃心造膝
朕有望焉勉服訓詞無怠率勵

崇矩字元靖上黨人始樞密中書門下同一幕趙
中令末年太祖惡其專而樞密使李崇矩乃其子
婦之父故特命析之迄今不改

事見
筆談

國朝中書樞

密先後上所言兩不相知以故多成疑貳然祖宗

亦賴此以聞異同之論用分宰相之權

南憲
紀談

己亥王仁瞻樞密副使

自內客省使樞密院承旨除

仁瞻字子豐唐州方城人初永興軍節度使劉訥薦其材可用太祖素知其名請於世宗隸帳下及受禪遂擢用之

四月乙丑薛居正呂餘慶並叅知政事

並自樞密直學士兵部侍郎除

梁改樞密院為崇政院唐莊宗復舊名遂改為樞密直學士○石林燕語

居正字子平開封浚儀人餘慶世本燕人○太祖初即位以歸德軍興王之地居正遂自觀察判官

權為給事中累遷兵部侍郎太祖歷滑許宋三鎮
餘慶並在幕府及即位累遷兵部侍郎是年初置
叅知政事為宰相副貳命居正及呂餘慶為之三
年二月餘慶以叅知政事出權知成都府時蜀初
平以執政莅藩自餘慶始也開寶五年以叅知政
事薛居正子惟吉呂餘慶子惟恭並為西頭供奉官
是年十一月命叅知政事薛居正兼提點三司准
南湖南嶺南水陸轉運使事呂餘慶兼提點三司

荆南劍南諸州水陸轉運使事○上欲為趙普置副而難其名稱召翰林學士承旨陶穀問曰下丞相一等有何官對曰唐有叅知機務叅知政事遂以樞密直學士兵部侍郎薛居正呂餘慶並本官叅知政事不宣制不押班不知印不升政事堂止令就宣徽使廳上事殿庭別設搏位於宰相勅尾署銜降宰相數字月俸雜給皆半之蓋上意未欲令居正等與普齊也至開寶六年上因雷有隣上

章告普私庇堂後官始有疑普意普恩益替六月

壬寅始詔叅知政事陞都堂與宰相同議政事庚

戌復詔薛居正呂餘慶更知印押班奏事以分其

權

長編

史臣李沆等曰按唐故事裴寂為僕射知政

事杜淹為御史大夫叅議朝政魏徵為秘書監叅

預朝政蕭瑀為特進叅議政事劉洎為黃門侍郎

叅知政事劉幽求為中書舍人叅知機務皆宰相

之任也又高宗欲用郭待舉等叅知政事既而謂

崔知溫曰待舉等歷任尚淺未可與卿同名稱遂
令於中書門下同受進止平章事以此言之平章
事亞於叅知政事矣今穀不能遠引漢御史大夫
亞相為對翻以叅知政事為下丞相一等穀失之
矣議者惜之○太祖始命叅政與宰相互知印時
議者謂穀為失然唐叅知政事固宰相之任曾何
以為百王不易之制殆稱謂適同爾官制輕重因
時蓋可見矣

南憲
紀談

乾德五年 丁卯

正月甲寅王仁贍罷樞密副使

責授右衛大將軍罷歸本班

舊制二府侍從有薄責多以本官歸班奉朝請而已初無職掌然班著請給並只從見存官初不以嘗經歷為高下也○南窓紀談

議王全斌王仁贍等罪詔曰王全斌等出總偏師遠征全蜀銳旅才臨於劍外降書已至于軍前朕念其伏罪畏威祈哀請命尋頒詔旨務在撫綏應孟昶宗親及偽命官吏諸軍將士一境生民並令安存不得驚擾而全

斌等違吾約束侮乃憲章專殺降兵擅開官庫豪奪婦女廣納貨財歛萬民之怨嗟致羣盜之充斥以至再勞徵發方獲平寧洎命抽歸尚欲含忍而訴寃者日擁國門今且據先次有狀隱沒金銀犀玉錢帛一十六萬七百餘貫文受偽蜀臣寮賂饋九萬餘貫擅打開豐德庫門除點檢外諸色納虧欠二十八萬一千餘貫遂令中書門下喚王全斌王仁贍崔彥進與訴索錢帛等人質正而全斌等具伏其令御史臺於朝堂集文武百官議罪

以聞

本朝大
詔令

仁瞻自乾德二年正月除樞密副使至是年正月
罷在樞密凡三年初詔王全斌等平蜀以仁瞻為
西川行營都監及蜀平而全斌等違約束殺降兵
以致羣盜充斥諸將還仁瞻歷詆諸將冀自免上
曰納李廷珪妓女開豐德庫取金貝此豈諸將所
為邪仁瞻皇恐不能對以其新有功不欲付獄吏
令中書門下省追問皆具伏所取受隱沒為錢六

十四萬四千八百餘貫詔御史集百官議全斌等
罪當死上特赦之

閏月乙丑沈義倫樞密副使

自西川隨軍轉運使給事中遷戶部侍郎除

義倫字惠恭陳留太康人名上一字避太宗舊名

後去之太祖領同州節制辟在幕府繼領滑許宋
三鎮皆從焉既受禪遂擢用之平蜀之役義倫為
西川隨軍轉運使獨居佛寺蔬食有以珍異奇巧
獻者皆却之東歸篋中惟圖書數卷而已時曹彬

自蜀還上嘗從容問以官吏善否彬惟薦義倫可
任上亦聞義倫清節過人故有是命義倫在樞府
六年至開寶六年九月拜相

開寶五年

壬申

乾德六年十二月改開寶元年

二月庚寅劉熙古叅知政事

自端明殿學士
兵部侍郎除

後唐明宗時孔循始議置端明殿學士二人專掌
顧問以馮道趙鳳為之班翰林學士上蓋樞密職
事官也。詳見石林燕語。國朝舊制職掌官外
有學士待制等貲端明殿學士等職皆為侍從清
望之選並無職掌多帶職以領在內
省府寺監在外藩方任使。舊典

熙古字義淳睢陽人太祖領宋州節制熙古為節度判官及受禪遂召用之

九月癸酉李崇矩罷樞密使

為鎮國軍節度使

崇矩自乾德二年正月除樞密使至是年九月罷在樞府凡八年時趙普為相與崇矩分秉國政崇矩以女妻普子承宗厚相交結太祖頗不悅有鄭伸者客崇矩門下十年至是上書摭其陰事訴之于是罷崇矩出鎮及卒贈太尉謚元靖以子繼昌

之子遵勗尚太宗女萬壽公主追封河東郡王遵
勗積官至鎮國軍節度使

開寶六年

癸酉

六月庚申劉熙古罷叅知政事致仕

熙古自開寶五年二月除叅知政事至是因足病
以戶部尚書致仕執政凡二年卒贈右僕射

八月甲辰趙普罷相

除檢校太尉河陽三城節度使同中書門下平章事

凡以檢校官兼中書令侍中同平章事並謂之使相唐制皆署勅五代以來不預政事朝會則綴本

欽定四庫全書

卷一 綱目

班正銜見謝則押班凡宣制除授者勅尾存其銜而不署側注使字○南憲紀談○故事宰相去位例除本官稍優則進官一等或易東宮三少惟趙韓王以開國舊臣且相十年故以使相罷蓋異思也自是訖太宗真宗皆不易舊制○石林燕語○祖宗以節度使中書令節度使侍中節度使平章事待勲賢故老久次宰相罷相隨其舊職加節度使出判大藩及召入未還相位而拜樞密使者則加樞密使以易節度故遂謂之使相雖中書令叙位亦在同中書門下平章事之下○舊典

制曰代天治物厥功已成仗鉞臨戎所委尤重雖弼諧而是賴且勞逸以惟均賧惟孟津介於河洛素為輿壤况乃近藩爰命台臣俾分閫寄具官趙普昔在霸府實為元

勲始當草昧之初首贊經綸之業千載起興王之運十年居調鼎之司帷幄伸謀股肱宣力變和萬彙已施濟物之功鎮撫三城適表出藩之貴帥壇受任相印兼榮永隆屏翰之權更勵始終之節

普自乾德二年正月拜相至是年八月罷獨相凡十年○普之為政也專廷臣多疾之是時官禁私販秦隴大木普嘗遣親吏往市屋材至京師治第權三司使趙玘廉得之以聞太祖怒便令追班將

下制逐普而王溥奏解之故事宰相樞密使每候對長春殿同止殿廬中太祖聞普子承宗娶樞密使李崇矩女即令分異之自崇矩罷上於普稍有間普又嘗以隙地私易尚方蔬圃以廣其居及營邸店翰林學士盧多遜因召對屢攻其短會雷德驤子有隣怨普之擠其父求所以報普時上知堂吏擅中書權多為姦賊有隣于是擊登聞鼓訟堂後官私事皆普庇之太祖怒令下御史府按治各

抵罪上始有疑普意矣普自是恩益替始詔叅知政事陞都堂與宰相同議政事復詔薛居正呂餘慶更知印押班奏事以分其權未幾遂罷去普嘗設大瓦壺於視事前閣中中外表䟽普意不欲行者必投之壺中東緼焚之其多得謗咎殆由此也

趙普自乾德二年至開寶六年罷獨相凡十年是後李昉自雍熙二年至垂拱元年罷凡四年王旦自景德元年至祥符五年罷凡七年呂夷簡自天聖七年至明道元年罷凡三年皇祐三年龐籍亦三年紹聖元年章子厚亦七年皆獨相而淳化元年呂蒙正亦獨相踰年○事見筆談

九月丁卯呂餘慶罷叅知政事為尚書左丞

尚書丞郎自兩省遷至者謂之百官之貴近與兩制兩省學士待制一等除任唯不預扈從。舊典

餘慶自乾德二年四月除叅知政事至是年九月

罷執政凡九年太祖幕客餘慶居其先趙普李處

耘首大用餘慶略不介意餘慶執政時會普忤旨

左右爭傾普餘慶仍力為辨析人稱其長者至是

有疾上章求解機務故有是命

己巳薛居正沈義倫並拜相

居正自吏部侍郎叅知政事除門下侍郎同平章事

仍前監脩國史。○義倫自戶部侍郎樞密副
使除中書侍郎同平章事集賢殿大學士

居正拜相制曰財成天地者元后之道燮理陰陽者冢
宰之權其有早踐巖廊久叅機務既著彌綸之效宜升
輔相之資

具官薛居正

文作國華才為人傑夙推雅望久服

大寮朕自膺寶圖茂建皇極酌用舊制簡求輔臣特命
豫大政於萬機下丞相之一等顧惟全德無忝明恩于
今歷年厥有成績疇庸之典無所吝焉是用擢正台司
仍兼史職懋官進秩真食增封於戲知臣者君子雖慙

於往聖以道佐主汝宜念於前賢永保令圖以承休命
義倫拜相制曰輔弼之臣邦家是寄緝熙庶政必賴其
嘉猷鎮撫四邊實資於重德騰機衡之近列有霸府之
舊僚疇佐命之功俾當爰立委調元之任允契具瞻

具官

沈義倫

儒行飭躬貞規邁俗保晏嬰之儉德富常賢之經

術自首逢興運歷踐通班掌漕坤維清風播於遠俗詢
謀密地素履光於盛時是用擢踐鼎司倚為國相正中
樞之貴位冠仙殿之羣儒式重元勲且符公望於戲創

業垂統予方致於治平當國秉鈞爾宜思於經制務恢
遠略以贊丕圖

居正開寶九年十月除尚書左僕射兼門下侍郎
昭文館大學士太宗太平興國四年十月除守司
空義倫開寶九年三月上將幸洛陽以為東京留
守尋召赴西京十月除尚書右僕射監脩國史太
宗親征太原以義倫留守判開封府事師還太平
興國四年加尚書左僕射

同日盧多遜叅知政事

多遜自翰林學士兵部員外郎遷中書舍人除

楚昭輔樞密副使

昭輔自左驍衛將軍判三司除

多遜懷州河內人昭輔宋城人○多遜博涉經史

善伺人主意太祖好讀書每問書中事多遜伺知

應答無滯太祖寵異之執政三年至九年十月拜

相○太祖初興禁衛嘗召昭輔置左右及即位以

其有心計遂擢權判三司至是除樞密副使開寶

九年以樞密副使昭輔右衛大將軍判三司王仁

瞻分領南北院事自後宣徽使闕即命樞密使副

兼領院事

樞密使副兼領宣徽南北院自此始

二月庚戌曹彬樞密使

自宣徽南院使義成軍節度使除檢校太尉忠武軍節度使充

彬字國華真定人太祖伐江南彬進圍金陵誓克

城之日不妄殺一人既克金陵城中皆安堵如故

始彬之行上許彬以使相為賞及還語彬曰今方

隅尚有未服者汝為使相品位極矣豈復力戰邪

且徐之更為我取太原因密賜錢五十萬未幾拜

樞密使領忠武軍節度使樞密領節度自彬始賞
江南之功也太宗即位加同平章事彬初以節度
使為樞密使不罷旄鉞至是加同平章事仍充樞
密使即罷旄鉞太平興國三年十一月以郊祀恩
加檢校太師四年十月以平定太原加兼侍中

宋宰輔編年錄卷一

欽定四庫全書

史部

宋宰輔編年錄卷二

詳校官太常寺少卿_臣陳桂森

編修_臣程嘉謨覆勘

總校官庶吉士_臣張能照

校對官編修_臣許兆椿

謄錄監生_臣夏大鼎

欽定四庫全書

宋宰輔編年錄卷二

宋 徐自明 著

太宗開寶九年

十二月改太平興國元年

十月庚申盧多遜拜相

自吏部侍郎參知政事除中書侍郎同中書門下平章事集賢

殿大學

士制闕

太宗以十月癸丑即位庚申多遜拜相太平興國

四年十月除兵部尚書

同日楚昭輔樞密使

自樞密副使除

太平興國三年十一月以郊祀恩加檢校太尉四年十月以平定太原加檢校太師

太平興國四年

己卯

正月庚寅石熙載簽書樞密院事

自樞密直學士除簽書樞密院事

熙載字凝績洛陽人太宗初領泰寧節度辟為掌書記及即位遂擢用焉是年除簽書樞密院事簽書樞密院自熙載始四月庚戌除樞密副使

兵部隸樞密院承五代之制有使副使至太宗朝初命石熙載以樞密直學士簽書樞密院事治平

中郭達以檢校太尉同簽
書樞密院事。官制沿革

太平興國六年

辛巳

六月甲戌司空平章事薛居正卒

居正自開寶六年九月拜相至是年六月薨于

位相太祖三年相太宗六年方入奏事疾作輿歸

而卒年七十贈太尉中書令謚文惠咸平二年配

享太宗廟庭居正操行方正為相任寬簡不苛察

士君子以此多之

九月辛亥趙普再入相

自太子太保除守司徒
兼侍中昭文館大學士

制曰協比者德皇王之大猷圖任舊人邦家之令典其
有功高締綬望著巖廊出領蕃宣入奉朝請輿望所屬

嘉言孔彰宜膺作礪之求再授秉鈞之寄

具官
趙普

建邦元

輔命世偉才早踐台衡載更時序蕭何畫一之法著於
廟堂甘盤舊學之臣屈在班列朕方寤寐良弼寅亮天
工詢于元龜歷選羣后用煩舊德弼予眇躬外以鎮撫
四邊內以平章百姓康濟庶務常思舟楫之言品題羣

材俾適輪轅之用佐佑寡昧臻于治平毋使丙魏房杜專美於前代也

太宗即位以普為太子太保普奉朝請累年盧多遜益毀之鬱鬱不得志上寤拜司徒侍中封梁國公廷美廢多遜南遷普之力也

同日石熙載樞密使

自刑部侍郎樞密副使除戶部尚書充

制曰文昌之設益重於六官温室之任聿參于萬務自非忠謹敦厚溫恭明允則何以追武帳之三接贊鴻樞

之百度職茲宥密以奉論思我之得人無愧前古

具官
石熙

載挺生間氣符會昌期早事初潛屢進苦口之說洎叅

樞近益勵匪躬之誠進思盡忠言必循理補袞無闕循
墻益恭朕之使人實受賜用尊名數式示倚毗俾兼
喉舌之司以重股肱之寄往踐樞軸必也正名克勵乃
誠同底于道

用文資正官充樞密使自熙載始也

十一月癸丑楚昭輔罷樞密使

為左驍
衛將軍

昭輔自開寶六年九月除樞密副使九年十月拜
樞密使至是年十一月罷在樞府凡十年昭輔性
勤謹介直掌樞務人不可干以私然無他材略至
是以足疾就第在告數月始命石熙載代其任會
郊祀畢乃有是命及卒贈侍中謚景襄真宗祀亳

回再贈中書令

太平興國七年

壬午

四月甲子竇偁郭贇並叅知政事

偁自右正議大夫樞密直學士贇自中書

舍人並守
本官除

正議大夫本諫議大夫避太宗舊諱國朝給事中
中書舍人諫議大夫並係兩省官給事左諫議隸
門下中書舍人右諫
議隸中書○舊典

柴禹錫樞密副使

自如京使除宣
徽北院使兼

偁字日彰薊州漁陽人贊字仲儀開封人禹錫字

元圭大名人○偁父周諫議大夫禹鈞五子曰儀

儼侃偁僖皆相繼登科時人謂之竇氏五龍偁先

與賈琰同在太宗幕府琰便佞希旨偁常疾之太

宗與諸王宴射琰頗稱贊德美詞多矯誕侮叱之
太宗不樂因罷宴遂出侮知涇州既大用太宗謂
曰汝自揣何以至此侮曰陛下以藩邸之舊出於
際遇太宗曰非也以汝嘗面折賈琰賞卿之直耳
十月卒詔輟視朝贈工部尚書侮喜同幕丁顥子
謂謂尚幼侮以女妻之後果至宰相○贄自太宗
任京尹時得侍讀藩邸及即位遂擢用之○禹錫
亦事太宗於晉邸太宗以藩府之舊多訪以外事

遂告秦王廷美陰事故寵用之八年六月遷宣徽

南院使

戊辰盧多遜罷相

責授兵部尚書

制曰調梅作礪中外之所瞻加膝墜淵古今之攸戒矧

於輔相之任必全進退之宜

具官盧多遜

早中科名亟更臺

閣久廻翔於近列嘗際會於先朝擢預中書俾叅庶政
洎予臨御首正台衡補袞之効茂聞由徑之蹤盡露節
虧忠藎道有依違尚塵廊廟之榮曷厭措紳之論爰伸

念舊用示匿瑕俾領夏官以奉朝請用全終始之義以彰廣大之恩

多遜自開寶九年十月拜相至是年四月罷為相
凡八年○趙普為相多遜屢短之於上前普由是
罷相多遜在相位普之子及親屬多為所抑普既
復相多遜不自安普屢諷多遜令引退多遜貪權
固位不能自決會普廉得多遜與秦王廷美交通
事遂以聞多遜坐秦王事責下御史劾其狀得實

詔文武常叅官集議之太子太保王溥等叅議言
多遜身處台司心懷顧望大逆不道干紀亂常上
負國恩下虧臣節請削奪官爵準律誅斬有旨配
隸崖州充長流百姓

多遜削奪官爵配隸崖州制曰臣之事君貳則有辟下
之謀上將而必誅

兵部尚書
盧多遜

頃自先朝擢叅大政洎予

臨御首正台衡職在燮調任當輔弼邦家之務一以咨
之朕既倚成汝合思報而乃交結藩邸窺伺君親指斥

乘輿謀危社稷大逆不道非所宜言因遣近臣雜治其
事醜跡共露具獄已成既有司之定刑俾外廷而集議
僉以梟夷其族汙瀦其宮用正憲章以合經義尚念嘗
居重位久事明廷特寬盡室之誅止用投荒之典實汝
有負非我無恩爾群臣當體茲意其盧多遜在身官爵
及三代封贈妻子官封並宜削奪追毀一家親屬並配
隸崖州充長流百姓仍終身禁錮縱更大赦不在量移
之限其期周以上親屬並配隸邊遠州郡禁錮

庚辰沈倫罷左相

責授工部尚書本名義倫避太宗舊諱

制曰

具官沈倫

頃自諸生幸逢興運亟登廊廟遂踐鼎司閔

閱無聞際會斯極洎于臨御尤所倚毗七年於茲恩寵
備至所宜盡心竭慮知無不為使內外和平苛慝不作
此宰相之任也昨盧多遜包藏逆節結構異端豈無姦
邪之謀見於舉措之際汝則與之同列積有日時安然
坐觀曾不先覺稔其醜跡上瀆朝經離我友于之親傷
我寬仁之德貪榮竊位於汝安乎雖復謝病引年拜章

上綬儻更優其爵秩何以肅於搢紳非我無恩蓋全大體六卿之任位望特隆深屈憲章粗伸警勵其子都官郎中繼宗本由父蔭不宜更在朝行可落班簿

倫以開寶六年九月拜相至是年四月罷相太祖
九四年相太宗七年倫清介在相位自守而已先
是倫與盧多遜同列多遜坐秦王廷美通謀事發
而倫前已病在告求致仕責其坐觀同列稔其醜
迹乃至於貶後請老復授左僕射致仕卒年七十

九贈侍中謚恭惠

太平興國八年

癸未

正月戊寅曹彬罷樞密使

自侍中罷為天平軍節度使

制曰萬機鞅掌溫室之任斯勤十乘隱轡齋壇之寄尤

重式均勞逸用示倚毗

具官曹彬

說禮敦詩體仁利物臨事

克彰於忠謹接下彌盡於謙恭兩朝備罄於腹心終日

不離於帷幄折衝千里雖藉樽俎之籌節制百城宜分

旄鉞之任輟茲禁中之位賜以汶上之田式勞申伯之

蕃宣毋忘段木之偃息

彬自開寶九年二月除樞密使至是年正月罷在
樞府凡八年酒坊使彌德超驟被委遇上急變云
彬秉政歲久得士衆心又誣彬有不軌之謀太宗
頗疑之彬不自辨遂有是命趙普嘗薦彬見太宗
因為辨其誣太宗大悟德超既得罪而待彬如故
其後太宗從容謂普自愧聽斷不明普對曰陛下
知德超有才而任用之察曹彬無罪而昭雪之有

勞者進有罪者誅此所以彰陛下之明聖也太宗於是釋然繼封魯國公

己卯王顯彌德超並樞密副使

顯自東上閤門使遷宣徽南院使兼○德超自

酒坊使遷宣徽北院使兼

顯開封人德超滄州人少皆嘗給事太宗於潛邸德超既諧曹彬彬遂罷顯與德超為南北院使並兼樞密院副使

二月庚申宋琪叅知政事

自右諫議大夫同判三司遷左諫議大夫除

琪范陽薊州人太宗為開封尹琪為府推官禮遇甚厚及即位遂擢用之七月庚辰加刑部尚書班叅政李昉上執政未幾一年十一月拜相

四月丁亥彌德超罷樞密副使

削官爵流瓊州

制曰

具官彌德超

闢葺常材斗筭小器朕昔在藩府嘗齒中

涓洎入纂於丕圖亦累遷於近職錄其尺寸之效陞於宥密之司而高則疾顛盈而亟覆詬詈同列指斥朕躬為臣若斯於法何逭朕求治斯切益急於用人引咎實

深詎忘於有罪御史閱實有司定刑合寘嚴誅以禦魑魅凡爾在位體茲好生其彌德超在身官爵並宜削奪其一家配隸瓊州禁錮

德超在樞府纔數月德超嘗上急變巧誣曹彬以他事太宗疑之出彬為天平軍節度使德超謂事成期得樞密使及是失意居常怏怏嘗詬王顯等曰我為國家言大事有安社稷功但得如綫許大名位爾等何人反在我上度上無執守為汝輩所

眩惑顯等告之太宗怒令鞠其事故抵於罪

六月己亥王顯樞密使

自宣徽南院使樞密副使加檢校太保充

制曰漢以尚書平章奏議魏以中書叅掌機密邦國之

務率繫於樞衡軍旅之謀多出於帷幄授受之際厥惟

艱哉

其官王顯

器量恢宏襟靈秀拔嘗事藩邸備極公忠累

踐榮班遂膺顯用風雨如晦益勵匪躬之誠夙夜惟寅

愈定致君之志樞密之任獻納攸資宜正名稱用伸毗

倚益堅許國之節式副知人之明

七月辛未郭贄罷叅知政事

責授秘書少監

制曰

具官郭贄

簪筆持橐獲侍於初潛曳組鳴珂久塵於清

切頃叅台席實代天工而啟沃蔑聞尸素斯極飲酒過
量自貽沈湎之譏發言無稽益彰容易之態所宜左降
尚屈典刑

贄執政凡一年曹彬為彌德超所譖贄為辨其誣
宰相趙普因是重之遂不次擢用至是以晨朝被
酒遂致罷黜尋知荆南府真宗即位累遷禮部尚

書及卒贈左僕射謚文懿贊長者喜延譽後進宋
白趙昌言皆其所薦也

庚辰李昉叅知政事

自文明殿學士工部
尚書除守本官充

太平興國五年置文明殿九年殿災
改建為文德殿遂廢此職○官制

昉字明遠深州饒陽人郭贇既貶中書惟趙普宋
琪時普恩禮稍替將復命相廷臣獨工部尚書李
昉宿舊上欲用昉叅政以琪先入當班列昉上加
琪刑部尚書昉守叅知政事昉執政僅半年十一

月拜相

六部尚書以吏部為冠兵部次之戶部次之刑部又次之禮部又其次而工部居下

八月庚戌石熙載罷樞密使

為尚書右僕射

制曰宥密之務蓋總於萬幾師長之任實叅乎百揆職

事斯設在勞逸而則殊名器所先固授受而惟允

具官石熙

載達識兼濟偉量旁通早在初潛實預賓佐韋弦之戒

動靜有常金石之誠夷險如一自總樞軸屢進讜言方

叅帷幄之謀遽嬰寒暑之病抗章引退瀝懇彌堅宜推

加等之恩即俟有瘳之喜勉思頤養式副倚毗

熙載自太平興國四年正月除簽書樞密院事四
月除樞密副使六年九月除樞密院使至是年八
月罷在樞府凡五年熙載以足疾多請告太宗幸
其第臨問久而不愈遂抗表求解機務故以優禮
罷卒贈侍中謚元懿熙載有文學立朝無顧避稱
薦善人有長者之譽與薛居正配享太宗廟庭子
中立景祐四年拜叅知政事

十月己酉趙普罷相

自司徒兼侍中罷為檢校太尉兼
侍中武勝軍節度使出鎮鄧州

制曰入總國政實冠三司之崇出分閫寄聿當二老之任所以推恩禮於輔弼伸倚注於勲賢斯為大猷豈敢虛授

趙具晉官

挺鍾間傑富稟誠明草昧之初締創之功夙

著巖廊之上啟沃之效居多朕疇咨老成叅用舊德再授鹽梅之寄用師藥石之言彌縫之績既彰調燮之勤斯著煩我耆艾職茲樞衡授以蕃宣均其勞逸用加掌武之秩以增衛社之雄大啟南陽夾輔王室

普自太平興國六年九月再入相至是年十月罷

再相凡二年普罷時太宗眷禮甚厚作詩餞之又謂之曰普於國家有勲力朕疇昔與之游今齒髮衰矣不欲煩以樞務俾之善地卧治云雍熙三年移山南東道節度使自梁國公改封許國公

十一月壬子宋琪李昉並拜相

琪自刑部尚書叅知政事昉自工部尚書叅知

政事並本官同中書門下平章事

制曰平章百姓唐堯所以疇咨總領衆職漢宣由是致治非賢罔又得士則昌聿求經濟之才爰授弼諧之任

枚卜斯允成命是行

具官宋琪

宇量冲深規模宏遠

具官李昉

鬱

有公望久服大寮而皆罄竭謨明裨贊樞輔君臣之際
人無間言公家之事行有餘力脩經術以自輔體方直
而靡渝是用擢正公台職茲調燮朕所注意不假審象
之求汝則致君更思補袞之効唯用虛已竚茲沃心欽

若訓詞徃踐乃位

並相同制

琪自庶僚一歲中為宰相其速如此昉初與盧多
遜善待之不疑多遜屢譖昉昉曰盧與我厚不爾

於是上語及多遜事昉頗為解釋上因言多遜居
常毀卿不直一錢昉始悟上由此益重之昉請復
時政記先進御然後付史館時政記進御自昉始

長編

雍熙元年十一月南郊畢琪遷門下侍郎昭文

館大學士昉遷中書侍郎監脩國史○太宗始即位
詔秦王廷美武功郡王德昭位在宰相上至是
詔自今宰相序立宜在親王之上李昉宋琪頓首
請遵故事上不許琪等又叩頭固辭久之上曰宰

相之任實總百揆與群官禮絕藩邸之設亦奉朝請而已元佐等尚幼欲其知廉損之道卿勿多辭也琪等拜舞稱謝

今宰相班在諸王上自此始

壬申李穆呂蒙正李至並叅知政事

穆自翰林學士遷左諫議除蒙正

自翰林學士都官員外郎除至自翰林學士都官郎中知制誥除

穆字孟雍開封陽武人蒙正字聖功河南人至字言幾真定人○穆文學操履為太祖所知太祖嘗謂盧多遜曰李穆士大夫之仁者也多遜曰穆臨

事不以死生易節所謂仁者必有勇也穆等既並
命對於玉華殿上謂之曰朕為官擇人惟恐不當
今兩制之臣十餘皆文學適用操履方潔穆居京
府尤號嚴肅故茲獎擢惟公也朕思閭里間每旦
焚香祝天子萬歲次則大臣眉壽朕與卿等焉得
不思善事以副億兆之禱耶皆再拜謝長編穆執政
未幾丁母憂不數日起復本官穆固辭不得已視
事未終喪而卒太宗臨哭出涕謂宰相曰穆潔已

守道操履純正真不易得朕方爾擢用遽茲淪謝
非斯人不幸乃朕之不幸輟視朝贈工部尚書呂
蒙正舉進士第一執政四年端拱元年拜相

同日張齊賢王沔同簽書樞密院事

並自樞密直學士
遷右諫議大夫除

齊賢字師亮曹州冤句人沔字楚望齊州人雍熙

元年十二月齊賢沔並遷左諫議大夫三年齊賢
以給事中知代州時大舉北伐代州楊業戰沒太
宗訪近臣以策齊賢請行即有此授初太祖幸西

都齊賢時以布衣獻策太祖召至便坐令面陳其
事齊賢以手畫地條陳十策內四說稱旨齊賢堅
執其六說皆善太祖怒令武士拽出及車駕還語
太宗曰我幸西都唯得一張齊賢耳我不欲爵之
以官異時汝可收之使輔汝為相也至太宗初即
位放進士牒決欲置於高等有司偶失掄選第在
三甲之末太宗不悅及注官有旨一牒盡與京官
通判齊賢釋褐授將作監丞通判衡州不十年為

相

雍熙二年

乙酉

太平興國九年十一月改雍熙元年

十二月丙辰宋琪罷相

為刑部尚書

制曰王者欽若大猷允釐庶政必藉台輔以張化原上

所以變理陰陽下所以康濟黎獻唯公是務與衆共之

其或時望有虧物情未允進退之際公議在焉

具官宋琪

早

以時才嘗依藩邸薦更歲月久効官常洎朕續承載懷
求舊攀附鱗翼騰躍風雲擢於會府之中處以公台之

任而識非遠大望屈具瞻曾無端謹之稱但有詖諧之
誚朝章政典無所建明百度彛倫如何式叙豈可以承
倚毗之重當憂責之任哉宜以秋卿俾還相印退之以
禮不謂無恩勉務欽承自求安逸

琪自太平興國八年十一月拜相至雍熙二年十
二月罷入相凡二年樞密使柴禹錫同罷上謂宰
相李昉等曰朕於大臣豈容易進退事不獲已方
行此命朕欲展宮城禹錫有別第在表識中上言

願易闡閭中官邸朕極不樂自此朕薄其為人乃
潛與宋琪相結為琪請流人盧多遜第朕命即賜
之多遜犯罪籍沒為宰相復請居之不避惡名豈
大臣之體乎然不欲暴其狀止以詆諧無大臣體
罷云拜罷錄琪有吏能而寡學識在相位百執事謁
見或有干請必面折之後拜右僕射卒年八十贈
司空謚惠安

國朝宰相享耆壽者十人宋惠安八十其後張鄧
公八十六陳文惠八十二富文公八十一杜祁公

八十宋元獻七十九李文定七十七曾宣靖八十
龐頴公七十六蘇丞相八十二文潞公雖至九十
四而薨貶秩蔡師垣亦八十晚節謫籍
南遷殂於中路不得全有富貴考終

同日柴禹錫罷樞密副使

自宣徽南院使罷為左驍衛大將軍

制曰樞密重地密勿近司倚注所先無加於此苟輿情

之未洽在公議以難安

具官柴禹錫

早自中涓升於近侍載

承求舊之寵驟遷宥密之司而不能盡瘁於事傾輸乃

誠苟且因循孤子委遇退居散地猶示優恩尚叅翊衛

之榮無忘欽承之意

禹錫自太平興國七年除樞密使至是年十二月

罷在樞府凡四年

雍熙三年

丙戌

正月戊戌李至罷叅知政事

自給事中罷授禮部侍郎

至自太平興國八年十一月除叅知政事至是年

正月罷執政凡二年至以目疾連表乞罷職養病

詔不許固請從之特賜月俸錢十萬

六月戊戌辛仲甫叅知政事

自御史中丞遷給事中

仲甫字之翰汾州人

八月丁酉王沔張宏並樞密副使沔自左諫議大夫簽書樞密院事除宏

自樞密直學士拜右諫議大夫除

宏字巨卿青州益都人

雍熙四年

丁亥

四月癸巳張宏罷樞密副使自樞密副使左遷御史中丞

趙昌言樞密副使

自御史中丞除樞密副使

昌言字仲謨汾州孝義人時河朔用兵張宏循默

備位無所建明而御史中丞趙昌言數上北邊利害故兩易之群臣皆竦動云宏在樞府幾一年○

王稱贊曰朝論以張宏循默故罷其政使與趙昌言更其任夫御史之職在觸邪而中丞之位號執

法事之利害人之忠佞皆得而言之其責豈不重

哉循默之人使充其位可乎

事畧○太宗時張宏真宗時李惟清皆自樞

密使為御史中丞蓋重言責也仁宗時亦多命前執政如晏元獻王安簡公皆是自嘉祐後迄今無

為之者○

石林燕語

端拱元年

戊子

雍熙五年正月改元

二月庚子李昉罷相

為尚書右僕射

制曰端拱崇資文昌右相蓋非賢而不授諒出綽以惟

公告爾具寮舉茲明命

具官李昉

巖廊舊德文學名儒踐臺

閣之通班素高聞望處鈞衡之大任久展謀猷謙和秉

君子之風純懿擅古人之美今者輟從三事總彼六卿

董齊喉舌之官載光北斗領袖搢紳之列首冠南宮用

資鎮俗之清規式表尊賢之茂典異數適尊於表著睠

懷別視於股肱佩服渥恩優游名器恭踐厥位惟往欽哉

昉自太平興國八年十一月與宋琪同拜相至是年二月罷入相凡六年○先有翟馬周者擊登聞鼓訟李昉身任元宰屬北戎入寇不憂邊思職但飲酒賦詩并置女樂等事上以方講籍田稍容忍之於是召翰林學士賈黃中草制授昉右僕射罷政且令黃中切責之黃中言僕射師表百僚舊宰

相之任今自工部尚書拜乃殊遷非黜責之義也

若以文昌務簡均佚為辭庶幾得體上然之

長編

同日趙普呂蒙正並拜相

普自檢校太師兼侍中
南道節度使除太保兼侍中

昭文館大學士三入相
蒙正自給事中叅知政
事除中書侍郎兼戶部尚書
監脩國史並同中書
門下平
章事

普昭文相制曰尊賢養老上古格言念舊錄勲前王令
典而况再登廊廟三秉節旄始終不易於純誠出入咸
膺於大用爰疇茂德用降徽章

具官
趙普

大昴儲祥維嵩挺

秀翊天飛之景運名冠公王蘊台輔之嘉謨功書簡策
早從黃閣旋擁高牙隆中盡偃於仁風峴首更歌於善
政加以心惟許國道在安民封章屢納於忠言致理率
陳於正道佐予涼德繫乃宗臣朕所以卜在會朝委之
論道彝倫未叙將俟於緝熙庶政闕然佇期於寅亮是
以輟從藩輔復踐巖廊加帝保之崇資冠鸞臺之舊列
咨上公而詢庶政彌切倚毗昌洪業以永丕圖更資光

輔

蒙正拜相制曰天道無私日月星辰助其照皇王不宰
股肱輔弼代其功所以端拱仰成垂衣致治建千年之
昌運追三代之令猷其有業茂經綸才推謹厚叅大政
而再罹寒暑秉純誠而無替初終宜推爰立之恩式副
至公之選

具官呂蒙正

四氣均和五行鍾秀蘊濟時之明略

輔之以溫恭挺命代之宏材守之以淵默凡膺歷試早
振芳猷公忠推社稷之臣凝重見廟堂之器瞻茲大體
久鬱具瞻爰資作礪之功用正秉鈞之任崇階馭貴列

爵增封兼脩太史之書載踐地官之秩爾宜周旋庶政
左右眇躬緩茲宵旰之憂翊我隆平之運同底于道豈
不美歟

普至是凡三入相上親耕籍普表求入覲太宗從
其請禮成冊拜上諭普曰卿勿以位高自縱勿以
權重自驕但能謹賞罰舉賢能彌愛憎何憂軍國
之不治朕若有過卿勿面從古人耻其君不及堯
舜卿其念哉蒙正質厚寬簡有重望不結黨與遇

事敢言每論政有未允者必固稱不可上嘉其無
隱故與普俱命藉舊德為之表率也蒙正晚輩與
普同位普甚推許之

長編

○普次子趙承煦自襄州

衙內都虞候為六宅使普再入相未始為求官上
特命之普嘗戒其子弟曰吾本書生偶逢昌運受
寵踰分固當以身許國私家之事吾無預焉汝等
宜各勉勵勿重吾過故自宥密升朝輔出入三十
餘年未始為其親屬求恩澤者

宰相子為
六宅使

近制宰

相子起家即授水部員外郎加朝散階先是盧多遜為相其子雍即授此官後遂以為常呂蒙正固

讓止授九品京官將作監丞因以為定制

長編

宰相子止授九品京官自呂蒙正始本朝三入相者趙韓王呂文穆文靖張鄧公文潞公蔡元長雖四入而不克有終○揮塵錄

同日王沔叅知政事

自樞密副使遷戶部侍郎除

張宏樞密副使

自御史中丞遷工部侍郎除

楊守一簽書樞密院事

自客省使遷宣徽北院使除

宏前已為樞密副使後以循默無所建明乃用御史中丞趙昌言為樞副而改宏為御史中丞至是復為樞密副使○守一初為晉邸涓人太宗即位遂擢用之守一在樞府纔七月是年九月卒贈太尉忠武軍節度使

三月甲戌趙昌言罷樞密副使

自工部侍郎責授崇信軍節度使行軍司馬

責趙昌言等詔曰朝廷詔爵位以待賢能明刑法以馭群下苟回邪之自露在典憲以宜行具官趙昌言早以微才

擢居重任訐謨之效未見於盡忠險詖之蹤頗聞於植黨交結非類玷辱清朝合首從之原情正刑書之顯戮特寬窮究以示包荒俾出佐於藩垣仍不奪於章綬噫予之待士無愧於至公爾之戴君頗乖於誠節宜思自咎勿謂無恩

昌言在政府幾一年昌言與戶部侍郎陳象輿刑部郎中董儼知制誥胡旦直史館梁顥厚善四人日常會於昌言之第故京師有陳三更董半夜之

語旦又作大言恠誕之詞使翟馬周者上之其言
多排毀時政自薦可為大臣力舉旦等十數人皆
公輔之器俾昌言內為之助會京尹許王廉知其
事白之太宗大怒捕馬周繫獄究治流海島昌言
與旦等皆貶黜云

拜罷錄

端拱二年

己丑

七月己卯張齊賢樞密副使

自右諫議大夫簽書樞密院事遷刑部侍郎除

張遜簽書樞密院事

自鹽鐵使遷宣徽北院使

遜博州人太宗在藩邸得隸帳下及即位遂擢用
焉○時中書門下言所錄時政記緣皇帝每御前
殿樞密院已下先上宰臣未上所有宣諭聖語裁
製嘉言無由聞知慮成漏略自今樞密副使二人
逐旋抄錄送中書遂詔樞密副使張宏張齊賢同
抄錄自後樞密院事皆送中書同脩為一書而授

史官副使知院二員同掌之

長編

淳化元年

庚寅 端拱三年
正月改淳化元年

正月戊子趙普罷相

罷為太保兼中書令充西京留守河南尹

國初沿唐故事尚書令侍中中書令為三省長官未改官制前異姓未有兼中書令者惟贈官有之

國史并
敘談

制曰帶河之誓蕭相首於羣臣分陝之寄周公冠於二

老矧乃功宣締創績著巖廊懇辭金鉉之榮願遂安車

之志不加殊禮曷報茂勲

具官趙普

字量淵深風規震肅翊

戴先帝實有佐命之勲弼諧冲人益見匪躬之節而自

再持將鉞三冠鼎司駿假宣猷寅恭協德小大之務知

無不為夙夜之勤浸以成疾聿遵賜告之典懇陳避位
之言喻之再三終不可奪輦洛之地成周舊壤王畿之
廣實切於保釐京邑之重允瞻於表則乃兼八柄之秩
往撫千里之邦勉荷寵章式資卧理

普自端拱元年二月三入相至是年正月罷居相
位二年初太宗欲相呂蒙正以其驟進人望未允
藉普舊德以鎮之遂再用秉政普自去秋以病免
朝謁止日赴中書治事有大政則召對及冬病益

甚車駕屢幸其第省問賜予加等遂稱疾篤三上表致仕上不得已以普為西京留守河南尹加中書令懇辭再四太宗賜手詔曰開國元勳惟卿一人不同他等母至固避俟首途有日當就第與卿為別普捧詔涕泣力疾請對頗言及國家事上嘉納之普以衰病再乞骸骨進位太師封魏國公給宰相俸令於西京私第養疾

祖宗以三師三公為宰相親王使相之官及宰臣官至僕射致仕者即較在位久近拜太尉太傅等

官若太師即為異恩本朝惟趙韓王普以勲文潞公彥博以年得之外曠世不拜仍自司空五遷方至太師有若王文正公旦呂文靖公夷簡皆任相二十年纔以太尉致仕可見國家重太師官也○
舊典

淳化三年太師魏國公趙普卒年七十一太宗聞訃震悼謂近臣曰普國初元勲事先帝與朕最為舊故能斷大事盡忠國家真社稷之臣因出涕贈尚書令封真定郡王謚忠獻輟視朝五日命右諫議大夫范杲持節護喪事至道二年進封韓王咸

平二年二月配饗太祖廟庭普之子孫至今顯榮
不絕

國朝稽西漢非劉氏不王之制只封皇之期親為
王其近親以年勞久次止封郡王而已至於贈典
非后之父祖亦不預王爵惟祖宗以趙忠獻佐命
興邦以建宗社若曹彬之封秦王潘美之封鄭王
雖功亞趙忠獻終緣有若
孫為后而得之○舊典

淳化二年 辛卯

三月乙丑辛仲甫罷叅知政事

給事中罷為工部尚書知陳州

仲甫自雍熙三年六月除叅知政事至是年三月

罷執政踰三年仲甫從容自守而已至是以足疾
罷出知陳州後告老致仕進太子太傅卒年七十

四贈太子太保謚康節

四月辛巳張齊賢陳恕並叅知政事

齊賢自刑部侍郎
樞密副使除恕

自鹽鐵使遷
給事中除

齊賢執政凡七年九月遂拜相○恕字仲言洪州
南昌人恕為鹽鐵使有心計釐去宿弊太祖深器
之曰真鹽鐵使也太宗即位遂大用焉

同日張遜溫仲舒寇準並樞密副使

遜自宣徽北院使
簽書樞密院事除

仲舒準俱自樞密直
學士遷左諫議大夫除

仲舒字秉陽河內人準字平仲華州下邽人

同日張宏罷樞密副使

為吏部
侍郎

宏自端拱元年二月復為樞密副使是年四月罷

在樞府一年餘後進工部尚書卒贈右僕射

九月丁酉王沔陳恕並罷叅知政事

沔自戶部侍郎
恕自給事中並罷

守本
官

沔自太平興國八年十一月除簽書樞密院事雍
熙三年八月除樞密副使端拱元年二月除叅知
政事是年九月罷執政凡八年恕自淳化二年四
月除叅知政事至是亦罷執政纔數月○自趙普
出守西洛蒙正以寬簡居相位辛仲甫從容其間
王沔怙恩招權政事多決於沔沔聰察敏辨善敷
奏有適時材用先與張齊賢同被進擢掌樞務頗
不叶齊賢出守代州沔遂為副使叅知政事陳恕

筦鹽鐵性苛察亦嘗與沔忤於是齊賢與恕並在
中書沔心不自安慮群官有以中書事告齊賢等
左司諫王禹偁上言中書樞密不得於本廳接見
賓客並於政事堂同見以防請託沔心喜即奏可
下其事左正言謝泌上言以為如此是疑大臣以私
也陛下聰明寄於輔臣苟非接見群官何以悉知
外事若令都堂候見則群官咨事無時是大臣常
須百執事於都堂無解衣之暇設若杜公堂請謁

之禮豈無私室乎塞相府請求之門豈無它徑乎
上覽奏嘉歎即命追還前詔事遂止汚又以弟淮
故數為樞密使寇準所詆上亦寤汚任數好詐非
廊廟器詔書切責之恕執政未幾以洩禁中語遂
與汚同日俱罷汚性苛刻不以至誠待人群官謁
見必甘言以啗之皆喜過望既而進退非允人胥

怨矣

長編

乙亥呂蒙正罷相

自戶部尚書罷
為吏部尚書

制曰宰相之任所以代天工執闕柄內以平章百姓外

以鎮撫四邊華夏具瞻安危攸繫其有訐謨獻納淺聞

苦口之言朋黨比回深失蒼生之望宜行策免以肅朝

經具官呂蒙正擢自單平累遷清要驟登三事于茲九年所

宜盡瘁公家屬精庶政任當補袞而曷嘗有聞知在挈
餅而曾無所守但務引援於親姬寧思澄汰於品流竊
祿偷安莫斯為甚匿瑕藏垢誠合自知儻更倚於弼諧
是自貽於蒙蔽政之有闕悔不可追用全進退之宜式

表始終之分尚居會府俾領天官允謂優隆勿忘循省
蒙正自端拱元年二月與趙普同拜相至是年九
月罷凡四年先是上封事者言立儲貳事太宗謂
近臣曰此事朕自有時耳會正言宋沆等請建立
許王元僖詞意狂率沆乃蒙正妻族遂斥為團練
副使又金部員外郎張紳知蔡州坐贓免有為紳
營解於太宗謂蒙正以舊憾文致其罪即命復紳
官而蒙正亦不自辨至是緣宋沆事罷免後因考

院得紳舊事實狀黜為團練副使蒙正復入相云

事畧

同日李昉張齊賢並拜相

昉自尚書右僕射守本官兼中書侍郎同平章事監脩國

史齊賢自刑部侍郎叅知政事除吏部侍郎同平章事

昉齊賢並相制曰國家並建庶官歷選群后聿求公輔之器付以調燮之權上以增三光之明下以慰兆民之望叅用耆老所以坐鎮雅俗疇咨俊乂所以垂拱仰成得人惟艱枚卜斯允

具官李昉

學窮緼素識茂經綸久服大

寮嘗居台席奉行故事蔚有賢相之風師長庶僚聿為

外廷之表

具官張齊賢

臨事能斷好謀而成再總樞機備觀

猷替勵蹇蹇之節知無不為體恂恂之規動必由禮而

皆久積問望深練謨明屬茲宵旰之勤宜符夢卜之選

是用並命陟於黃扉汝其澄汰九流緝熙百度以昉畫

一之法足以申昭舊章以齊賢不貳之心足以斟酌元

化同德盡瘁底予于休當念致君於唐虞無使專美於

丙魏服是休寵欽若訓詞

自後並相各自一制

昉初以太平興國八年十一月與宋琪同拜相至
端拱元年二月以尚書右僕射罷是年九月復入
相

同日賈黃中李沆並叅知政事

自翰林學士並
遷給事中除

黃中字媯民滄州人沆字太初洺州人○黃中年
六歲中神童十五歲舉進士沆初判吏部銓因侍
曲宴太宗目送之曰李沆風度端凝真貴人也不
數月遂與黃中俱蒙大用

癸卯王顯罷樞密使

自檢校太傅責授隨州刺史
崇信軍節度觀察處置等使

制曰裨贊元首實賴於股肱緝熙庶務允歸於樞軸苟

依違而無狀必黜陟之是行

具官王顯

早自中涓亟陞近列

一掌樞務十年於茲叅幃幄之籌曾無補職之効居負

乘之地實有致寇之虞而乃植立私黨紊撓紀綱蔽賢

傷善固寵偷安盖非據之使然於盡瘁而何有揣斗筭

之器既有覺於滿盈畏措紳之言始懇求於引退朕以

情深念舊志在包荒百拜祈恩有足哀者九命作牧舉

而授之勉思全度之仁無忘惕厲之戒

顯自太平興國八年兼樞密副使六月遷樞密使
是年九月罷在樞府凡八年顯自三班不數年正
樞任獎擢之速無與為比居位僅十年屬蕃戎寇
邊河決近郡機務煩急朝夕咨訪顯無謀略不任
職太宗切責之顯再拜謝過遂有是命

甲辰張遜知樞密院事

溫仲舒冠準同知樞密院事

遜與仲舒準並自
樞密院副使除

知院同知院之名自此始遜與仲舒準仍並帶副使自後或以正官或檢校官為之秩與副使同未

即真則稱檢校

知院同知院之名自此始

淳化四年 癸巳

六月丙寅張齊賢罷相

自吏部侍郎罷為尚書左丞

制曰居元首者實賴於股肱濟大川者必資於舟楫其有自陞廊廟載歷星霜粗彰夙夜之勤宜全進退之禮具官張齊賢服膺儒術策名清途久叅宥密之司嘗委折衝

之寄每好談於方略輒自許於功名驟遷鈞軸之權尋
正燮調之任疇茲俊德輔佐眇躬而力不逮心名浮於
實況多居於假告特宜解於鈞衡俾遷左轄之崇資勉
奉南宮之故事

齊賢自淳化二年九月拜相至是年六月罷居相
位僅二年先是殿中丞朱貽業叅政李沆之姻與
諸司副使王延德同監京庾延德託貽業白沆求
補外官沆以語齊賢齊賢以聞太宗曰延德嘗事

晉邸不自陳而輒干執政遽召見責之延德言未
嘗有請遂召齊賢質之齊賢言得於貽業而貽業
不以實對齊賢不欲援沆為證乃自引咎由此太
宗疏之遂至罷相事涉干請而辭連叅知政事李
沆齊賢獨任其責物論美之

壬申張遜罷樞密副使知院事

自宣徽北院使責授右領衛將軍

寇準罷樞密副使同知院事

自左諫議大夫罷守本官

遜罷樞副制曰

具官張遜

早在初潛備觀勤蓋尋遷近列嘗

總利權倚其帷幄之謀擢在樞機之地而乃植置朋黨
交構是非貝錦之詞聿彰於萋菲挈瓶之智已極於滿
盈特推求舊之恩俾示從輕之典列茲環衛勉荷寵光
準罷樞副制曰具官冠準擢贊樞衡荐更歲律雖頗彰於勤
瘁而自掇於悔尤交構是非煩黷公上所宜罷免勿忘
省循

遜自端拱二年七月除簽書樞密院事淳化二年
四月遷樞密副使九月遷知院事至是年六月罷

在樞府凡四年準自淳化二年四月除樞密副使
九月同知樞密院事至是年六月罷在樞府凡三
年○張遜素與寇準不協每奏事頗相矛盾太宗
將罷之至是準與溫仲舒偕行歸第有狂民舞蹈
於馬前街使王賓與遜雅相善知準與遜有隙因
奏言之太宗以為詰準自辨實與仲舒同行遜執
王賓奏斥準詞氣悖厲互發其私上怒故貶遜而
罷準

同日柴禹錫知樞密院事

自涪州觀察使遷宣徽北院使除

劉昌言同知樞密院事

自樞密直學士遷右諫議大夫除

呂端叅知政事

自右諫議大夫樞密直學士守本官除

昌言字禹謨泉州南安人端字易直叅政呂蒙正之弟○禹錫太平興國七年四月嘗為樞密副使

雍熙二年十二月罷至是除知樞密院事○端執

政二年至道元年四月拜相

十月辛未李昉罷相

依前尚書右僕射罷知政事

賈黃中李沆罷叅知政事

黃中沆自給事中並罷守本官

溫仲舒罷同知樞密院事

自右諫議大夫罷守本官

昉罷相制曰變和陰陽輔相天地秉至公而貞百度熙

庶績而刑四方此宰相之任也苟或依違在位啟沃無

聞雖居廊廟之崇莫著彌綸之効宜敷詔旨用罷鼎司

具官李昉夙仕昌辰薦升華貫朕嗣膺丕構渴見老成驟遷

侍從之班再荷鹽梅之寄所宜翊宣帝載啟迪皇猷竭

智慮以代天工體誠明而操國柄歲時屢換績用闕然

朝廷損益之彝章宗社安危之大計疇咨闕決屬在廟
堂汝自處機衡曾無規畫壅化源而斯久孤物望以何
深朕纂服臨民虛心待理倘黃樞要務尚委於具臣則
蒼昊景靈懼貽于深譴宜免公台之重庶全進退之私
俾長中臺尚為優渥

昉自淳化二年九月與張齊賢同拜相至是年十
月罷再入相凡二年餘黃中自淳化二年九月除
叅知政事至是年十月罷執政凡二年沆自淳化

二年九月除叅知政事至是年十月同罷執政凡
二年仲舒自淳化二年四月除樞密副使九月除
同知樞密院事至是年十月罷在樞府凡二年○
先是去年夏旱蝗因問闕政太宗憂形於色翼日
雨昉等拜賀太宗切責曰久愆時雨何由而致昉
與宰相張齊賢叅知政事賈黃中李沆慙懼上表
待罪四年昉以私家衰戚求罷不許後日召學士
張洎草制除左僕射罷相洎因上言近霖雨百餘

日昉職在變調陰陽乖戾如此而無歸咎引避之意矧中臺僕射之職百僚師長不減於左低昂輕重不侔因而授之何以勸人臣之盡節宜加黜削以儆具臣太宗以昉耆舊不欲譴黜乃批洎奏守本官奉朝請焉

拜罷錄

後昉上章引年拜司空致仕

太宗嘗謂侍臣曰李昉可謂善人君子矣卒年七十二贈司徒謚文正子宗諤景德二年為翰林學士及卒真宗悼之謂宰相曰國朝宰相以聲名自

立門閤者惟昉與曹彬家爾○黃中多知臺閣故事朝之典禮資以損益當時名士皆出其門雖小心畏謹然執政循默政事多稽留不決物論以此少之未幾遂罷卒贈禮部尚書

同日呂蒙正再入相

自吏部尚書守本官同中書門下平章事

制曰昔者虞舜之時優游於巖廊之上周武王垂拱而天下理此無他術蓋得人而委之以政也因念萬機之務屬在中樞民具爾瞻朕所注意是用疇咨庶尹對越

上玄敷求良材付以茲任

具官呂蒙正

卷懷經濟蹈泳中和

而自踐歷華資弼諧庶政識謨明之大體罄勤瘁之小心出領天官坐鎮雅俗炎涼載貿望實彌優方今百度將隆兆民思泰朕勵精更始昭德塞遠載詢廟廊之訃謨用建朝廷之經濟若涉大水浩無津涯爰資髦碩之賢再踐公台之位秉國鈞而建皇極允人望而代天工汝其薦樂石之謹言輔茲不逮贊金玉之王度致於無為弼予一人永底于道

蒙正以端拱元年二月拜相至淳化二年以吏部尚書罷是年十月再入相先是淳化二年呂蒙正罷為吏部尚書復相李昉是年昉罷蒙正復入相○太宗因上元觀燈蒙正侍宴謂蒙正曰五代之際生靈凋喪謂無復太平之日矣朕躬覽庶政萬事粗理每念上天之貺致此繁庶乃知理亂在人蒙正避席曰乘輿所在士庶走集故繁盛如此臣嘗見都城外不數里饑寒而死者甚衆不必盡然

願陛下視近以及遠蒼生之幸也太宗變色不言

蒙正侃然復位同列咸多其諒直事

畧

○太宗欲遣

人使朔方諭中書選材而可責以事者蒙正退以

名上太宗不許它日凡三問終不易其人因固稱

其人可使餘人不及且言臣不欲用媚道妄隨人

主意以害國事同列皆惕息不敢動太宗退謂親

信曰蒙正氣量我不如而卒用蒙正所選者果稱

職

同日趙鎔向敏中並同知樞密院事

鎔自樞密都承旨遷宣徽北院使除

敏中自樞密直學士遷右諫議大夫除

蘇易簡叅知政事

自翰林直學士遷給事中除

鎔滄州人敏中字常之開封人易簡字太簡梓州

人○鎔初以刀筆事太宗于晉邸及即位遂擢用

焉○敏中與張詠俱有時名太宗嘗飛白書向敏

中張詠二名付中書語宰相曰此二臣者名臣也

朕將用之矣與詠並為樞密直學士遂決意大用

○易簡自知制誥除翰林學士充承旨易簡多振舉翰林故事太宗為飛白書院額曰玉堂及以詩賜之易簡為學士年未滿三十在翰林八年特受人主之遇夔絕倫等或一日至三見李沆後入在易簡下及先執政乃以易簡為承旨錫賚與叅政等上意欲遵舊制且俟稔其名望乃正台席而易簡以親老急於進用因召見頗言時政得失沆等罷即命易簡代之

丁丑趙昌言叅知政事

雍熙四年昌言嘗為樞密副使因坐翟馬周事貶
為崇信軍行軍司馬後以右諫議大夫知大名府
是年召為給事中叅知政事

淳化五年

甲午

九月乙亥寇準叅知政事

自左諫議大夫
知青州召除

淳化二年寇準為同知樞密院事與張遜不協罷
知青州太宗對左右數語及準有間言至終不能

移上意也是年召為叅知政事因奏對切直太宗
怒起準輒挽上衣留以俟處決太宗歎曰真宰相
才也又嘗語左右曰朕得寇準猶唐太宗之得魏
鄭公也加給事中

長編

至道元年

乙未 淳化六年正月改元

正月癸亥趙昌言罷叅知政事

自給事中出為川峽都
部署尋改戶部侍郎罷

政事知
鳳翔府

昌言自淳化四年十月除叅知政事是年正月罷

再執政踰一年李順搆亂太宗命昌言為川陝五
十二州招安行營馬步軍都部署既行有奏昌言
無嗣息鼻折山根不宜遣握兵入川即詔駐鳳翔
蜀平改戶部侍郎罷政事知鳳翔府及卒贈吏部
尚書謚景肅昌言善推獎後進嘗薦李沆以為有
公輔之器又以女妻王旦二人皆賢相也昌言臨
事果斷無所顧避雖屢經擯斥未嘗少自抑損

戊辰錢若水同知樞密院事

自翰林學士遷
諫議大夫除

若水字淡成河南新安人

同日劉昌言罷同知樞密院事

昌言自淳化四年六月除同知樞密院事至是年
正月罷在樞府凡二年太宗既寵用昌言或言其
委母妻鄉里十年不迎侍者詔令迎歸京師昌言
竟用是罷除給事中知襄州卒贈工部尚書

四月癸未呂蒙正罷相

自吏部尚書罷為尚書
右僕射出判河南府

制曰邦國政治蓋出於中樞朝廷紀綱盡歸於會府矧

乃端揆之任聿居師長之崇苟非台鉉之賢曷慰播紳

之望

具官呂蒙正

挺生英氣符合昌期自光夢卜之求遂荷

鹽梅之寄謨明匪懈亮直不渝爰自天官再持政柄洎
和鼎實時維老成朕欽若丕圖建用皇極雖彌綸大體
固未協於康哉而勵翼小心亦備觀於勤止頗鬱隆平
之望宜均勞逸之功長是中臺式茲百辟地高務簡足
以養頤勉服寵光徃踐乃位

蒙正自淳化四年十月復相至是年四月罷再入

相踰一年蒙正既罷政入謝太宗曰僕射師表百僚朝廷重臣朕以中書政事煩多俾均勞逸蒙正頓首謝

同日呂端拜相

自左諫議大夫叅知政事除戶部侍郎同平章事

制曰王者對越穹壤司牧蒸黎必求髦碩之賢寘於輔相之任總領衆職俾朱紫之洞分鎮撫四邊使金革之不用夙夜宥密朝夕論思聿求其人乃命以位

呂具官端簡

直夷曠宣慈惠和挺王佐之偉才負人倫之碩望項自

擢叅樞軸再歷炎涼運奇兵於廟堂詢謀惟允貢昌言
於帷幄謇諤可嘉適當求理之辰益見匪躬之節矧又
周知大體多識舊章用晦而明中立不倚王商厚重既
遠懾於羗戎謝傅玄虛可坐鎮於雅俗宜踐公台之位
允符師尹之瞻汝當思堯舜以致君無使其不及體黃
老而行化用致乎無為欽若告言以終令聞

二年正月南郊畢進門下侍郎兼兵部尚書三年
四月真宗即位覃恩除尚書右僕射監脩國史端

歷官四十年始大用太宗常恨任用之晚端持重
識大體同列奏對或多異議一日內出手批戒諭
自今中書事經呂端裁決乃得聞奏

同日柴禹錫罷知樞密院事

自宣徽北院使罷為鎮
寧軍節度使知涇州

蘇易簡罷叅知政事

自給事中叅知政事罷
為禮部侍郎出知鄧州

禹錫自淳化四年六月除知樞密院事至是年四
月罷再登樞府凡二年及卒贈太尉子宗慶尚太
宗女魯國長公主○易簡自淳化四年十月除叅

知政事至是年四月罷執政踰年易簡與同列趙
昌言有隙多爭忿上前太宗頗優容之又素與張
洎不協頗為洎所攻遂罷政事易簡性嗜酒卒時
年三十九贈禮部尚書

同日張洎叅知政事

自翰林
學士除

洎滁州全椒人初仕江南李煜後歸朝洎與蘇易
簡同在北扉易簡被殊遇且先大用洎惡之力排
易簡遂代為叅知政事

甲申趙鎔知樞密院事

自宣徽北院使同知樞密院事除

鎔與柴禹錫並掌機務禹錫出鎮鎔知院事

至道二年

丙申

二月庚辰李昌齡叅知政事

自御史中丞除

昌齡字天錫應天府楚丘人

七月丙寅寇準罷叅知政事

為給事中

準自淳化五年九月再入政府踰年而罷先是郊祀行慶中外交官吏皆進秩準遂率意輕重其素所

喜者多得臺省清秩所惡者及不知者即序進焉
廣州左通判馮拯轉虞部員外郎右通判太常博士彭惟節乃轉屯田員外郎拯嘗與準有隙故準抑之惟節自以素居拯下章奏列銜皆如舊不易準怒以中書劄子陞惟節於拯上切責拯仍特免勘罪拯忿曰上日閱萬機寧察見此細事蓋準弄權爾上疏極言并及嶺南官吏除拜不均凡數事又封中書劄子以進上大怒準準持中書簿領論

曲直於上前上益不悅遂罷歸班尋出知鄧州

至道三年

丁酉

正月丙子溫仲舒王化基並叅知政事

仲舒自戶部侍郎除化基自

禮部侍郎除

化基字永圖真定人○時邊境多事上垂欲相仲舒而罷呂端會不豫乃止○初化基累遷左拾遺抗疏自薦太宗曰化基自結人主慷慨之士也召試知制誥至是遂有此除

同日李惟清同知樞密院事

惟清字直臣齊州人

同日張洎罷叅知政事

為刑部侍郎

洎自至道元年除叅知政事是年正月罷執政凡二年洎性險詖好攻人之短洎諂事寇準準力推輓之故同秉大政既與準同列知太宗眷準稍衰乃面奏準退有誹謗準色變不敢辯由是罷政未幾洎亦疾罷尋卒



宋宰輔編年錄卷二